

1259-1259- OFP - Acta Capitulum Generalium Valencensis Celebrati

In nomine patris et filii et spiritus sancti. Amen.

Acta capituli generalis Valencensis celebrati
anno Domini · M^o · CC^o · LIX^o.

Confirmamus has constitutiones. In capitulo de electione prioris conventualis. ubi dicitur. fratres autem post annum a professione sua. deleatur. post annum. et dicatur. post duos annos. Et hec habet · iii · capitula.

Item hanc. In capitulo de capitulo provinciali. ubi dicitur. cum singulis sociis a pluribus de capitulo suo. eciam citra medietatem eligendum electis. deleatur. eciam citra. et ponatur. ultra medietatem. Et hec habet · iii · capitula.

Item hanc. In eodem capitulo. ubi dicitur. infra vero idem tempus. alii non admittantur ad discussionem eorum que ad generale vel provinciale capitulum sunt mittenda. addatur. nec ad electionem socii prioris provincialis. Et hec habet · iii · capitula.

Approbamus has. In capitulo de electione diffinitorum capituli generalis et provincialis. ubi dicitur. aliquis de magis ydoneis a capitulo eligatur. deleatur. a capitulo eligatur. et totum quod sequitur usque. eius socius etc. et dicatur sic. aliquis de magis ydoneis a maiori parte provincialis capituli eligatur qui sit generalis capituli diffinitor. Et hec habet · ii · capitula.

Item hanc. Ubi dicitur in ordinario. quod fratres in paraseve discalciati vadant et intrent capitulum. deleatur. discalciati. Et hec habet · ii · capitula.

Item hanc. In capitulo de predicatoribus. ubi dicitur. ad exercitium etc. deleatur totum usque ad illud. nullus autem etc. Et hec habet · ii · capitula.

Item hanc. In capitulo de studentibus. ubi dicitur. nullus autem fiat publicus doctor. deleatur quod sequitur. nisi ad minus theologiam audierit per · iiiior · annos. et dicatur sic. nullus fiat publicus doctor. nec disputet etc. Et hec habet · ii · capitula.

Item hanc. In capitulo de inclinacionibus. ubi dicitur. quippiam vestimenti tribuitur. profunde inclinantes etc. deleatur. profunde. Et hec habet · ii · capitula.

Item hanc. In capitulo de electione prioris provincialis. post illud. includi sicut in electione magistri non oportet. addatur sic. si vero congregato capitulo provinciali. casu aliquo contingente provincia priore provinciali caruerit. ad ipsum provinciale capitulum secundum predictum modum eligendi; predicta electio pertinebit. Et hec habet · ii · capitula.

Item hanc. In eodem loco. ubi dicitur. de quolibet conventu ad hoc idem electos. addatur. a maiori parte conventus. omnibus fratribus. etc. Et hec habet · ii · capitula.

Item hanc. In capitulo de cibo. ubi dicitur. a cellarario. vel ministro. removeatur. a cellarario. vel ministro. et dicatur. a servitore. Et hec habet · ii · capitula.

Item hanc. In capitulo de conversis. ubi dicitur. scapularia longa et lata. addatur. usque ad iuncturam inter pugnum et brachium. que eciam etc. Et hec habet · ii · capitula.

Item hanc. In capitulo de capitulo generali. in fine dicatur sic. capitulum autem generale. uno anno. et capitula provincialia sequenti anno. et tercio iterum generale. et sequenti provincialia. et sic alternatim per annos succedentes generalia et provincialia capitula celebrentur. et quicquid contra sententiam huius constitutionis repertum fuerit in constitutionibus. per diffinitores sequentis tercii capituli removeatur. Et hec habet · ii · capitula.

Item hanc. In capitulo de officio ecclesie. ubi dicitur. surgant fratres dicendo matutinas. deleatur hoc et dicatur sic. postquam autem surrexerint fratres. dicant matutinas. Et hec habet · ii · capitula.

Inchoamus has. In capitulo de electione magistri. ubi dicitur. supersedeatur illo anno; a capitulo generali. addatur. si tamen inter diem pasche et festum trinitatis. casu aliquo contingente. ordo magistro caruerit. diffinitores nichilominus qui convenerint; generale capitulum celebrabunt.

Item hanc. In eodem capitulo. ubi dicitur. hoc autem ita fiat ut in secunda feria. etc. deleatur totum usque ibi. hec omnia vero que circa etc.

Item hanc. In capitulo de electione prioris provincialis. ubi dicitur. et duos fratres de quolibet conventu. etc. deleatur totum usque ibi. qui secundum formam. etc. et dicatur sic. et unum fratrem discretum de quolibet conventu ad idem electum. omnibus fratribus ad conventum illum pertinentibus qui vocem habent in electione illa. si commode fieri potest. convocatis. et tunc iste frater sic electus. pro socio prioris conventualis habeatur. isti autem electores secundum formam etc.

Item hanc. In capitulo de visitoribus. ubi dicitur. in capitulo provinciali predicto modo eligantur. deleatur predicto modo. et dicatur sic. secundum formam in electione diffinitorum provincialis capituli positam; eligantur.

Item hanc. In capitulo de suffragiis. in principio ubi dicitur. a festo sancti Dionysii. usque ad adventum. pro anniversario fratrum. addatur. et familiarium receptorum per literas ad beneficia ordinis. clericus psalterium etc.

Item hanc. Domus Gandensis et Brugensis; sint de provincia Francie.

Item hanc. In capitulo de electione prioris conventualis. post illud ubi dicitur. admittantur ad electionem predictam. addatur. electio autem tam priorum provincialium. quam conventualium. ad illos tantum pertineat electores; qui personaliter. presentes in electione extiterint. sicut fit in electione magistri.

Item hanc. In capitulo de capitulo generali. in fine dicatur sic. quodcumque ante festum sancti Michaelis ordinem magistro carere contigerit. tunc in vigilia sequentis festi pentecostes. magistri electio celebretur. et in secunda feria sequenti procedatur ad celebrandum capitulum generale. eciam si sit annus. in quo alias non deberet generale capitulum celebrari.

Item hanc. In capitulo de capitulo generali. ubi dicitur. nec eodem anno. etc. deleatur totum usque. cum autem etc. et dicatur sic. et tunc provinciale capitulum celebretur. eciam si sit annus in quo capitulum non deberet alias celebrari. nichilominus sequenti anno illa provincia. sicut et cetera; provinciale capitulum celebrabit.

Item hanc. In capitulo de electione magistri. ubi dicitur. ad capitulum veniat generale. addatur. pro huiusmodi vero electione electorum magistri facienda. semper provinciale capitulum celebretur. eciam si sit annus in quo non deberet alias celebrari.

Item hanc. In capitulo de electione prioris provincialis. ubi dicitur. et tunc provinciale capitulum celebretur nisi prius. addatur. illo anno fuerit celebratum.

Item hanc. In capitulo de visitatoribus. in principio. ubi dicitur. statuimus. etc. deleatur totum quod sequitur. usque ibi. qui excessus. et dicatur sic. statuimus quod in singulis capitulis provincialibus. que alternatim cum capitulis generalibus celebrantur. eligantur. secundum formam in electione diffinitorum capituli provincialis positam. visitatores ad visitandam provinciam in duobus annis sequentibus. · iiiior · fratres ad primum annum. vel plures. secundum quod provinciali capitulo videbitur expedire. et totidem ad secundum.

Iste sunt **admoniciones.**

Fratres qui non debent habere sigilla secundum ordinem; non habeant. nec eciam in manubriis suis aliquam impressionem sigillorum.

Item. Qui scribunt magistro vel provincialibus. vel capitulis. scribant de litera grossa. et legibili. et brevi-ter. aliter non habeant pro malo. si nichil eis rescribatur. vel nichil fiat eorum que petunt.

Item. Priores non contrahant debita magna sine consensu conventuum suorum. et in computationibus semper sciatur que sint debita domus. et eciam persone quibus debeantur. vel que debeant aliquid domui.

Item. Fratres qui transierunt ad alios ordines. in quibus perseverant; ad multam familiaritatem a fratribus non admittantur.

Item. Fratres celebraturi missam. antequam sacris se induant; de confessione se expediant.

Item. Iniungimus prioribus omnibus de provincia Provincie. quod ipsi provideant infra festum omnium sanctorum. quod fratres laici omnes de conventibus eorum habeant scapularia minora talis coloris. quod magis similia sint nigro quam albo coloris. Alioquin ex tunc quilibet in cuius conventu istud non ductum fuerit ad effectum. quilibet septimana una die ieiunet in pane. et aqua. quousque perductum fuerit ad effectum.

Iniungimus priori provinciali Hispanie. quod ipse ordinet aliquod studium ad addiscendam linguam arabicam. in conventu Barchinonensi. vel alibi. et ibidem collocet fratres aliquos. de quibus speretur. quod ex huiusmodi studio possint proficere ad animarum salutem. Quicumque autem et de quacumque provincia. voluerit addiscere linguam arabicam; scribat hoc magistro.

Item. Iniungimus districte. et in virtute obediencie. quod nulle mulieres pro sororibus habeantur. a fratre quocumque; nisi de quibus constiterit prioribus provincialibus. in quorum provinciis sunt constitute. quod auctoritate alicuius magistri ordinis. vel capituli generalis vel alicuius pape; cure ordinis sunt commisse. Priores autem provinciales. inquisitione facta super hiis diligenti. in sequenti capitulo magistro referant. quot et quas. et in quorum conventuum terminis. de huiusmodi sororibus domos habeant.

Item. In vita beati Dominici. in rubrica ubi dicitur. qualiter episcopus Oxomensis instituit monasterium de Pruliano. deleatur. episcopus Oxomensis. et dicatur. beatus Dominicus. etc. Similiter ibidem. in textu ubi dicitur. dei servus Didacus. deleatur hoc totum. et dicatur. beatus Dominicus.

Item. In ordinario de modo recipiendi ad beneficia in tenore literarum de beneficiis. que ibi inseruntur. in fine ubi dicitur. et tantum pro vobis fiat. quantum pro uno fratre defuncto. communiter in nostro ordine fieri consuevit. deleatur hoc totum. et dicatur sic. et misse et oraciones per totum ordinem iniungantur pro vobis. sicut pro fratribus nostris defunctis; fieri consuevit. Et hoc fit; quia magister ordinis reputat illam falsam.

Item. Procurent priores. quod habeant novam correctionem de officio ecclesiastico. et libros de ea bene correctos. et illa que certo sciuntur de officio isto esse. amodo dicantur a fratribus. et sciant omnes quod magister ordinis nichil de cetero immutare proponit.

Item. Parisius non petatur licencia legendi in theologia neque licenciatus incipiat. nec legens dimittat. nisi de consilio magistri. si fuerit in provincia Francie. vel de consilio prioris provincialis Francie; si magister in Francia non fuerit.

Item. Ad promocionem studii ordinamus hoc. quod lectores non occupentur in officiis vel negociis; per que a lectionibus retrahantur.

Item. Quod diligenter inquirent priores provinciales de iuvenibus aptis ad studium. qui in brevi possint proficere. et eos in studio promoveant.

Item. Quod talis inquisicio fiat singulis annis per visitatores in singulis conventibus. et referatur capitulo provinciali.

Item. Quod ad studia generalia ordinis non mittantur fratres. nisi qui sunt bene morigerati; et apti ad proficiendum.

Item. Quod si in aliqua provincia non possint haberi lectores in omnibus conventibus. provideatur saltem. quod fratres maxime iuvenes non semper remaneant in illis conventibus. sed quod mittantur ad loca in quibus sunt lectores.

Item. Quod si non possunt inveniri lectores sufficientes ad publice legendum. saltem provideatur de aliquibus qui legant privatas lectiones. vel hystorias. vel summam de casibus. vel aliquid huiusmodi. ne fratres sint ociosi.

Item. Quod fratribus iunioribus. aptis ad studium. parcatur a discursibus et aliis occupationibus; ne a studio retrahantur.

Item. Quod ordinetur in provinciis que indigerint. aliquod studium arcium. vel aliqua; ubi invenes instruantur.

Item. Quod fratres qui remanent a scholis; dure puniantur.

Item. Quod tempore lectionis non occupentur in missis celebrandis. vel aliis huiusmodi. nec vadant in villam; nisi pro magna necessitate.

Item. Quod priores vadant ad scholas sicut ceteri fratres. quando commode poterunt. Item. Quod lectores vacantes vadant ad scholas. precipue ad disputationem. Item. Quod non fiant lectores vel predicatorum vel confessorum. nisi sint tam sufficientes. quod possint sine periculo notabili huiusmodi officia exercere.

Item. Quod priores et visitatores. et magistri studencium. sint solliciti diligenter inquirere. qualiter fratres et precipue iuvenes circa studium occupentur. et qualiter in studio proficiant; et puniant negligentes.

Item. Quod lectores quantumcumque fieri poterit. continuent lectiones suas.

Item. Visitatores singulis annis diligenter inquirent de lectoribus quantum legerint in anno. et quociens disputaverint et determinaverint. et quot conventus sue visitacionis careant lectoribus. et quid circa hoc invenerint; referant in capitulo provinciali. et defectus notabiles qui circa hoc inventi fuerint. priores et diffinitores; referant postmodum capitulo generali.

Item. In singulis provinciis. singulis annis. in quolibet provinciali capitulo ordinetur. qualiter studentibus provideatur sue provincie missis ad quecumque studia generalia.

Item. Visitatores diligenter inquirent. qualiter studentibus provideatur. et referant defectus notabiles capitulo provinciali; per quod efficax remedium apponatur.

Item. Provideatur quod quilibet lector tenens aliquod sollempne studium. habeat baccellarium; qui legat sub eo.

Item. Quod fratres portent ad scholas libros qui leguntur in scholis. si habent. et non alios.

Item. Quod in quolibet conventu. ubi est lector. instituat aliquis frater. qui diligenter repetat. dum[modo] sit in conventu aliquis sufficiens.

Item. Quod fiant repetitiones de questionibus. in qualibet septimana. ubi hoc commode poterit observari.

Item. Cum multi conventus sint in multis provinciis qui carent lectoribus. iniungit magister omnibus visitoribus huius anni. quod ipsi ubicumque invenerint aliquos lectores vacantes. vel alios qui legere possint; inducant eos ex parte magistri. ut ipsi attendentes necessitatem ordinis exponant se ad legendum. in aliquibus provinciis que indigerint lectoribus. per duos annos. vel tres. in remissionem omnium peccatorum suorum. et si quos invenerint ad hoc se offerentes. tam ipsi fratres quam visitatores; significant hoc magistro sine mora.

Absolvimus priores provinciales; Theutonie. et Terre sancte et provincie Provincie. Priores vero conventuales; Bituricensis. Attrebatensem.

Hec sunt **suffragia**.

Pro domino papa. et statu et tribulationibus tocius christianitatis; quilibet sacerdos · iii · missas etc.

Capitulum sequens assignamus in provincia Theutonie. apud Argentinam.

Fratres de Ungaria. si a tartaris fugantur; caritative recipiantur ubique.
Pro magistro. Unam missam rogat sibi dari. quia multas amisit.
De his que portantur ad corrigiam. quoniam videntur rasores.
De comestione conversorum. Quando debent petere panem. detur eis licencia.
De ostensione accusationum priorum. quod non fiat.
De licencia confitendi. quidam dicunt quod habent licenciam a magistro. audiendi confessiones. et absolvendi. et non credatur eis.
Actis additae sunt litterae magistri ordinis; cf. app. n. XI.